

Rapport dalla seduta dil cussegl da vischnaunca dils 14 da november 2023 a Vuorz.

La presidenta dil cussegl, Mengia Risch fa a tuts presents in cordial beinvegni alla seduta da questa sera.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Damai ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 23 da matg 2023

Il protocol ei vegnius tarmess allas cusseglieras ed a tuts cussegliers. La presidenta dil cussegl suttametta el alla discussiun. Da tala vegn buca fatg diever. Il protocol vegn approbaus unanim e senza cuntervuschs.

2. Informaziun ovra hidraulica cun reservoir a Danis

Enstagl da seglir sin igl express solar dalla Confederaziun ha la suprastonza decidiu per la construcziun dad ina secunda ovra hydraulica en cumbinaziun cun il reservoir a Danis. Il reservoir a Danis sto tenor rapport da controlla dil cantun vegnir sanaus proximamein. Cunquei ch'il reservoir ei buca accessibels per far ina sanaziun, havein surdau a Walter Deplazes, inschignier, il qual ha schon planisau l'ovra a Casut, d'ellavurar ora in project per ina secunda ovra en cumbinaziun cun il reservoir a Danis. Per quella construcziun ei previu dus onns da construcziun ed ei dat contribuziuns cantunalas sco era federalas. Tgei che ei previu per il proxim onn ei veseivel el preventiv. La secunda etappa ei previda el 2025.

Clau dat informaziuns detagliadas dil project previu. El declara sco quei project ei previus da realisar e co las contribuziuns cantunalas e federalas vesan ora. La ovra vegness construida sin terren dall'Xpo, la quala ei cuntenza da dar giu il terren en dretg da baghegiar alla vischnaunca.

La discussiun vegn dada libra. Sin las damondas sa vegnir dau risposta per cuntentienscha dils cussegliers.

3. Piazza supplementara secretariat 60% en l'administraziun

Naven digl 1 da november 2021 ei igl uffeci da baghegiar en funcziun tier nossa vischnaunca. Las lavurs da secretariat havein entochen oz repartiu sin las ulteriuras conlvrerars dalla controlla da habitonts. Il davos temps ei denton semussau che las lavurs egl uffeci da baghegiar basegnan adina dapli ressursas da tut ils conlvrers en l'administraziun, aschia che autras lavurs stattan anavos. Era vegn adina dapli pretensiuns davart ils uffecis cantunals quei che pertucca il baghegiar (fotovoltaic, plan da zonas, instradar lubientschas da baghegiar electronicas sur igl entir cantun etc.) Sut quellas cundiziuns eis ei buca pli pusseivel da far tut quellas lavurs cun il personal existent. Vitier vegn aunc che havein buca anflau in/ina emprendist/a sin igl 1 d'uost 2024. Clau dat aunc sclariment detagliau daco che nus essan visai vi sin quella piazza.

La suprastonza fa la proposta al cussegl, da scaffir ina piazza supplementara da 60% sco secretaria naven digl 1 da schaner 2024.

La discussiun vegn dada libra. Suenter cuorta discussiun decida il cussegl unanim (13 :0) da scaffir ina piazza da 60% el secretariat dall'administraziun.

4. Preventiv e quen d'investiziun 2024

Il preventiv ei vegnius tarmess tier a tuts cusseglers per informaziun. Tal siara suenter expensas da frs. 15'100'260 ed entradas da frs. 15'906'021 cun in surpli entradas ell'altezia da frs. 805'761. Quei preventiv ha saviu vegnir fatgs tenor il quen annual 2022 sco referenza. Il quen d'investiziun preveda expensas da frs. 5'250'000 ed entradas da frs. 498'000. Las investiziuns netto muntan per consequenza a frs. 4'752'000.

Il president communal repassa il preventiv dil quen current sco era dil quen d'investiziun e dat sclariments tier tut las posiziuns. Sin las damondas tschentadas sa vegnir dau risposta. Propostas per midadas vegn fatg neginas. Il cussegl approbescha entras tscherna unanima (13:0) e senza cuntervuschs il preventiv cun quen d'investiziun 2024 per mauns dalla radunonza communal. Cun quella aprobaziun ein era ils credits necessaris tenor il quen d'investiziun concedi.

Il president communal presenta aunc il plan da finanzas (investiziuns) per ils proxims 4 onns (2025 – 2028). Quei plan ei in instrument da lavur per la suprastonza e sto buca vegnir approbaus dil cussegl. Ils cusseglers han priu enconuschientscha dil plan, il qual vegn era presentaus alla radunonza communal.

5. Pei da taglia 2024

Mintg'onnn han il cussegl da vischnaunca e la radunonza communal la pusseivladad da fixar il pei da taglia.

La suprastonza fa la proposta da schar il pei da taglia sco tochen dacheu sin 90% dalla taglia cantunala sempli.

La taglia sin schischom sto tenor lescha da taglia vegnir fixada mintg'onnn da niev. Quella importa denter 1.5 entochen 2.0 promils. La suprastonza fa la proposta da restar sco tochen dacheu sin sin 1.7 promils.

Las damondas vegnan suttamessas alla discussiun. Era la cumissiun da quen e gestiun sustegn la proposta dalla suprastonza. Autras propostas vegn fatg neginas. Cun tscherna unanima (13:0) decida il cussegl per mauns dalla radunonza communal da fixar il pei da taglia ordinari sco tochen dacheu sin 90 % dalla taglia cantunala sempli ed il pei da taglia sin schischom sin 1.7 promils.

6. Elecziun dalla suprastonza dil cussegl per la proxima perioda d'uffeci

Tenor constituiun sto la suprastonza dil cussegl vegnir elegida mintga onnn.

a) president/a dil cussegl

Mengia Risch ei stada il davos onnn en uffeci sco presidenta dil cussegl. Sco successur fa il vischinadi da Breil la proposta sin il vice-president Gérard Carigiet. Ulteriuras propostas dat ei buc.

Cun tscherna unanima elegia il cussegl Gérard Carigiet sco niev president dil cussegl da vischnaunca per la proxima perioda d'uffeci dad in onnn.

b) vice-president/a dil cussegl

Cunquei che Gérard Carigiet ei vegnius elegius sco president dil cussegl sto vegnir elegiu in niev vice-president ni ina vice-presidenta. Il vischinadi da Dardin fa la proposta sin Andrea Cathomas-Friberg. Ulteriuras propostas dat ei neginas.

Cun tscherna unanima elegia il cussegl Andrea Cathomas-Friberg sco nova vice-presidenta dil cussegl da vischnaunca per la proxima perioda d'uffeci dad in onnn.

c) actuar dil cussegl

La suprastanza communal fa la proposta sin il canzlist Curdin Cadonau. Ulteriuras propostas dat ei neginas.

Cun tscharna unanima reelegia il cussegl Curdin Cadonau sco actuar dil cussegl per la proxima perioda d'uffeci dad in onn.

7. Varia

Il 27 da settember 2023 ha giu liug ina uatga cun la dertgia cantunala en connex cun la via da colligaziun Breil – Vuorz. Clau informescha il cussegl giudlunder.

Clau Schlosser informescha il cussegl che la suprastanza hagi elegiu ina cumissiun per ellavurar ora propostas per nossa destinaziun turistica. Quella cumissiun vegn accumpignada entras Celine Meury dalla Regiun Surselva e vegn sustenida finanzialmein dil cantun. Aschispert che resultats ein avon maun, sa vegnir informau giudlunder.

Quei ei stau la davosa seduta dil cussegl el 2023. Clau engrazia alla presidenta Mengia Risch per siu engaschi egl onn presidial.

Mengia Risch engrazia als cussegliers per la presenza e la partizipaziun e fa attents sin la radunonza communal che ha liug igl 1 da december 2023 a Breil. Ella giavischa allas cusseglieras ed als cussegliers in bien retuorn a casa e siara la seduta dallas 21:30 uras.

Breil, ils 15 da november 2023

La presidenta

Mengia Risch

Igl actuar

Curdin Cadonau